

### Ina clara decisiun, in clar signal!

Dacuort ha la 100avla radunonza generala dall'Uniun cantunala da catschadurs da patentà giu liug a Tavau. Denter auter ei il parlament dils catschadurs era s'exprimius davart l'iniziativa encunter la catscha d'atun ni la catscha supplementara, sco ella vegn era numnada. La parola ei clara. Cun 192 encunter 11 vuschs e treis abstenziuns han ins decidiu a moda persuadenta da cumbatter cun peis e mauns quella iniziativa.

Igl onn 1910 ha il cantun schau examinar ina cumissiun co ei fussi pusseivel da recaltgar dapli daners entras la catscha. La cumissiun ei vegnida tier la conclusiun che quei seigi pusseivel mo entras l'introducziun dalla catscha da revier. Quei ha fatg vegnir attents ils catschadurs. Tochen igl onn 1913 ha ei dau in techet ruaus. Lu ha il pievel acceptau la revisiun parziala dalla lescha da catscha, malgrad che quella ha alzau il daner per la patentà da 12 francs sin 40 francs, da lezs onns in alzament considerabel. Avon quella votaziun han 19 catschadurs fundau ils 16 da mars 1913 a Landquart l'Uniun cantunala da catschadurs da patentà. Cun forzas unidas levan els cumbatter il sistem da revier e s'engaschar pil manteniment dalla libra catscha da patentà. Oz dumbra quella uniun 74 secziuns ed ad ella appartegnan ferm 8000 catschadurs e catschadurs. Era oz smanatschan da tuts prighels encunter la catscha. Pil mument stat ina iniziativa encunter la catscha supplementara avon porta. Quella catscha caschuna dapi onns vivas discussiuns, era enteifer las retschas dils catschadurs. Tenor lescha ei il cantun obligaus da reglar las populaziuns dalla

selvaschina. Els biars cass reussescha quei senza grondas difficultads cun nies sistem dalla catscha da patentà enteifer nossas catschas usitadas. Empau problems caschuna la regulaziun dallas populaziuns dallas tscharvas. Enteifer la catscha dil settember eis ei buca pusseivel da sittar il diember pretendiu. Ins ha gia empruau da tuttas variantas, denton senza il success giavischau. Durent il settember sesanflan biaras tscharvas el Parc Naziunal, ordeifer ils cunfins dil Grischnun ni els asils per selvaschina. Quella selvaschina setegn si pér tard igl atun en territoris nua ch'ins sa far catscha sin ellas. Perquei sto ei esser dau la pusseivladad da far catscha enteifer ils meins november e december sin quels animals. L'iniziativa pretenda ch'il diember da tscharvas stoppi vegnir reglau enteifer ils meins settember ed october. Ils iniziants presentan praticamein neginas sligaziuns co quei duess atgnamein esser pusseivel da far. Cun scumandar la catscha supplementara ei il problem buca sligiaus. Da quei ei era la pluralitad dils catschadurs persuadida. Cun rodund 95% dallas vuschs han ils delegai decidiu dacuort da cumbatter quella iniziativa, priu il cass che quella vegn avon il pievel. A caschun dalla radunonza ein negins dils adherents dall'iniziativa s'exprimi. Clar ch'ei drova dabia curascha da s'exponer «ella tauna digl uors». Sto esser ch'ils arguments mauncan ni ch'els persuadan tuttina buca avunda, pertgei munconza da curascha civila less jeu buca attestar ad els. La radunonza da delegai fuss stau il liug adattau per ina discussiun pro ni contra la catscha supplementara. Mo

cun brevs da lecturs, cun attaccas nundefundadas, cun derasar caussas che constatan buca e cun svegliar fallidas emenziuns eis ei buca fatg. Pils catschadurs resta ei da star attents. Cun votums fundai e persuadents stuein nus informar la gliעד che va buca a catscha sur dalla necessitad dalla catscha supplementara. Dues l'iniziativa vegnir avon il pievel vala ei da ponderar bein co votar. Vegness quella iniziativa malgrad tut nos sforzs tuttina acceptada dil pievel, savess quei haver nauschas consequenzas per nossa libra catscha da patentà. Per quella ein nos antenats s'engaschai cun peis e mauns gia avon tschien onns ed era nus lein buca schar metter ella en prighel.

Ins auda gia che zanu ord in cagliom semus-chegi in'otra iniziativa, ina aunc bia pli radicala. A mi para ei che biara gliעד hagi piars la sauna relaziun tier la natira. Quei che trumpescha mei aunc bia pli fetg ei il fatg che era catschadurs tegnan si sac a tendenzas da persunas extremas, persunas che han en mira dad insumma dismetter la catscha.

A caschun dalla radunonza da delegai han ins era eligiu in niev comite central cun *Robert Brunold* da Sursaissa alla testa. Els ein cunsciens da lur greva incarica. Tonpli eis ei stau impurtont ch'il parlament dils catschadurs prenda ina clara posiziun encunter l'iniziativa pil scamond dalla catscha supplementara. Cun quei clar votum sa il comite central sepreparar ad uras e cun fermas armas da cumbatter l'iniziativa, priu il cass che quella vegn avon il pievel.

*Venanzi Nay, Zignau, delegau secziun Tödi*